



▲ 题图 南宋 萧照 秋山红树纨扇 绢本

## 01

### 长安遇冯著

客从东方来，衣上灞陵雨。  
问客何为来（来何为），采山因买斧。  
冥冥花正开（满），飏飏燕新乳。  
昨别今已春，鬓丝生几缕。

## 02

### 东郊

吏舍局终年，出郊旷清曙。  
杨柳散和风，青山澹吾虑。  
依丛适自憩，缘涧还复去。  
微雨霭芳原，春鸠鸣何处？  
乐幽心屡止，遵事迹犹遽。  
终罢斯（期）结庐，慕陶真可庶。

## 03

### 夕次盱眙县

落帆逗（透）淮镇，停舫临孤驿。  
浩浩风起波，冥冥日沈夕。  
人归山郭暗，雁下芦洲白。  
独夜忆秦关，听钟未眠客。

## 04

### 淮上喜会梁州故人

江汉曾为客，相逢每醉还。  
浮云一别后，流水十年间。  
欢笑情如旧，萧疏鬓已斑。  
何因北（不）归去，淮上对（有）秋山。

## 05

### 杂体五首 其二

古宅多袄鸟，群号枯树枝。  
黄昏窥人室，鬼物相与期。  
居人不安寝，搏击思此时。  
岂无鹰与鹞，饱肉不肯飞。  
既乖逐鸟节，空养凌云姿。  
孤负肉食恩，何异城上鷃。

## 06

### 春宵燕万年吉少府中孚南馆

始见斗柄回，复兹霜月霁。  
河汉上纵横，春城夜迢递。  
宾筵接时彦，乐燕凌芳岁。  
稍爱清觞满，仰叹高文丽。  
欲去返郊扉，端为一欢滞。

## 07

## 与村老对饮

鬓眉雪色犹嗜酒，言辞淳朴古人风。  
乡村年少生离乱，见话先朝如梦中。

## 08

### 饯雍聿之潞州谒李中丞

郁郁雨（两）相遇，出门草青青。  
酒酣拔剑舞，慷慨送子行。  
驱马涉大河，日暮怀洛京。  
前登太行路，志士亦未平。  
薄游五府都，高步振英声。  
主人才且贤，重士百金轻。  
丝竹促飞觞，夜宴达晨星。  
娱乐易淹暮，谅在执高情。

## 09

### 自巩洛舟行入黄河即事寄府县僚友

夹水苍山路向东，东南山豁大河通。  
寒树依微远天外，夕阳明灭乱流中。

孤村几岁临伊岸，一雁初晴下朔风。  
为报洛桥游宦侣，扁舟不系与心同。

## 10

### 同德精舍养疾寄河南兵曹东厅掾

逍遥东城隅，双树寒葱茜。  
广庭流华月，高阁凝馀霰。  
杜门非养素，抱疾阻良宴。  
孰谓无他人，思君岁云变。  
官曹亮先忝，陈躅惭俊彦。  
岂知晨与夜，相代不相见。  
缄书问所如（知），酬藻当芬绚。

## 11

### 善福精舍示诸生

湛湛嘉树阴，清露夜景沈。  
悄然群物寂，高阁似阴岑。  
方以玄默处，岂为名迹侵。  
法妙（泛如）不知归，独此抱冲襟。  
斋舍无馀物，陶器与单衾。

诸生时列坐，共爱风满林。

## 12

### 闲居赠友

补吏多下迁，罢归聊自度。  
园庐既芜没，烟景空澹泊。  
闲居养疴瘵，守素甘葵藿。  
颜鬓日衰耗，冠带亦寥落。  
青苔已生路，绿筠始分箨。  
夕气下遥阴，微风动疏薄。  
草玄良见诮，杜门无请托。  
非君好事者，谁来（能）顾寂寞。

## 13

### 寺居独夜寄崔主簿

幽人寂不（无）寐，木叶纷纷落。  
寒雨暗深更，流萤度高阁。  
坐使青灯晓，还伤夏衣薄。  
宁知岁方晏，离居更萧索。

## 14

### 独游西斋寄崔主簿

同心忽已别，昨事方成昔。  
幽径还独寻，绿苔见行迹。  
秋斋正萧散，烟水易昏夕。  
忧来结几重，非君不可释。

## 15

### 园林宴起寄昭应韩明府卢主簿

田家已耕作，井屋起晨烟。  
园林鸣好鸟，闲居犹独眠。  
不觉朝已晏，起来望青天。  
四体一舒散，情性亦忻然。  
还复茅檐下，对酒思数贤。  
束带理官府，简牍盈目前。  
当念中林赏，览物遍山川。  
上非遇明世，庶以道自全。

---

- 文献：《全唐诗》韦应物1~4
- 感谢@min在群内提名想读的《长安遇冯著》、《东郊》《夕次盱眙县》、《淮上喜会梁州故人》